

过谈。李椒仙通守来京引见，在上海守候湖南咨文，几至一年之久。

十六日。云生邀同石翹、时卿、赓臣游善因寺，在报国寺之西。寺为南梁汉兴元府之唐安寺旧基。明成（寺）化（大）〔太〕监姚中、赵得创修，太监陶荣又修，碑云弘治十六年也。凡六碑，其二碑则正德中立也。两旁为五百罗汉堂。寺宇宏敞，亦京师丛林之最巨者。往来京师三十余年，竟不知有此寺。僧诚静、昆安陪游。方丈德亮，外出未晤也。归饮广和居。

十七日。刘仲良枉过畅谈。两次召对，天眷优隆，枢府诸公加意慰劳，而方毅然陈请终养，可谓勇决矣，于区区一官何有哉！下午诣后铁厂看屋。王桂馥铨部为郑筱山前辈门人，亦能手也。舒兰生、周桂伍过谈。

十八日。接家信丙字四号，并接志城丙字五号及朱香荪各信。由阜康发递福建信，分丁禹生、张子衡两处汇交。禹生处分寄李子和、文星岩、冯展云、夏小陶、唐景星共六信；子衡处分寄葆芝岑、叶善堂、卢艺圃、章果堂、司徒伯芬、林福泉、雷颖生共八信。黄石珊、俞竹君过谈。

十九日。接瑞堂三月廿二日信，尚在四月初二第四信之前而未列号，瑞堂之昏如此。刘仲良召见二次，以母老乞养，奉旨慰留，谢恩又蒙召对。天眷如此，岂以其语言清利致然耶？凡此皆时命为之也。

二十日。发丙字五号家信，托黄石珊带南，并寄有木盒一只。接到意城及一侄杭州四月四日信。裴戟森、黎季龄、魏赓臣过谈。

廿一日。翁叔平、崇地山、夏子松次第过谈。叔平、地山以予屡次乞假，相就慰留。接合肥相国一信。

廿二日。董韞卿过谈，相与慰留，而言之（犹）〔尤〕切，至